

Rajottya Pyitru Niquejada Cateramu

Pyítrubay muchuveda

¹⁻² Ray Pyítru, Jesucrístu nusubyi, ray nurya catera jiryejyu, Judenumusiy juresavay jiryatijy sajaryeta jirye jiryetyevay cabyimusiy jijyu, jiryevyicha diye juravye Póntumu, Cadásiyamu, Capadásiyamu, Ásiyamu, Bitíniyamu jarye títajyu. Sajaryetada Vujye jirye, jiryatijy sadatyadanuma jityajyu jiryedye: “Riryaday tuvachu rimu.” Sajaryetada variy jijyu jirye, Suntutu, jiryatidye siitye variy saju, sapuy variy jiryivasirya jiyuuchuveda Jesucrístu nudajamusiy, jiryatijy vujyuuchuveda jiyasayadamu sabatyeda. Sama jasachura yentyutyada jiryejyu, samirya vichasada jarye risajyu.

Judenu jtedamujy vuyntuy

³⁻⁴ Vuryajchanatyaní Judenu, Vuyntyityu Jesucrístu jay, jiryatijy jaryi santyutyadamujy jipyirutyadeda vadi jnyadamujy vuy. Jiryatijy Jesucrístu misasubeda diibyimusiy, ramusiy jita vuyntuy rajiju vuryeyarurya sisa, jiryatijy sabayada jarichuvimu vujyura, jiryatijy vuryecha datyavay daryajyu. Ne taramuy rabaryiruy, dantyamuy ne rajarapuchara, ravichechara yechasara títajyu. ⁵ Jiryatijy vutyuvachu simu, sabay variy jivyanuyadata carayadajisivyuy, santuy vuryiva jiryamityadeda momujy, jiryatijy sadityanu yivijada rundamu vuy.

6-7 Ramunítij vuryíchanachara, dañuma vuñicha jarupantasavay taraquideju parucharimyusiy sutedamuju, satidye jantya ratara vutyuvachoda yimu, darya riryentya mamyi jiidatyara óru, riryatidye jatya rivasirya runodi, ramachõ rantyityura óru variy. Óru jita rabaryisara Vujye Judenuju day, vutyuvachoda jita ne rabaryisara saju day. Ramuní vutyuvachoda vichasara samiryavaju órujisiy saju, sajantya variy parucharimyusirya. Jesucrístu dityadoda rundamu jita sadityanusara Judenu yichanatyadamura vutyuvachoda, jiryatij sajaryetada jidyedyeñuju vuy, sabay varirya jidyanuyada vuryiva. ⁸⁻⁹ Dañumamuy ne vuñidiyada siva Jesucrístu, vuvyata jaryiñi. Dañumamuy ne vuñidyi diye siva didye, vutyuvachu variy simu day, vuryichanay jaryi variy, daryasarajutij ne rasara vuñiquejada tuchodajura. Nutyu vanda vichajomunuma vuryichanay varidye, jiryatij vutyuvachodamu santuyuchara vuryiva.

10-11 Riñi datyaruñuyada jita tarij Judenuju tuchuvay vuryentyutyadanchiy, rutajadoda jaryi ranchiy jiryatij sani jteda yasay Judenu vurya: ¿Nutyura rundamu racha jiryatij sadityanu Crístu jnutu riy, nutyura rundamu? ¿Nutyura rachasara rivyichada nijyanvay variy, nutyura? Sadatyadoda Suntú daryaju riy, nutyu saporutyajayasara Crístu rivayu, sadatya variy rivasirya vandamu vichada. ¹² Sadityadoda varintyiryi, ne rijyu darya saniquejada day, vujyu jita darya samituchoda day, jiryatij

rityuchoda tuchuvay vuryivara. Rityuchoda Judenu Jnutumusirya, jiryatiy supajadani Crístu jarichumusi. Riñi datyaruchara jita Judenu tuunu vichavantyi vuryentyutyasadanchiy.

Vuryantya vichasara vase Judenuju

¹³ Ramunítiiy jiryantya jdutyara jijechipiyajada, datyada jachityavay jiryecha, jiryatidye nutuy titaju jityuvachodata santyutyada momusiy, jiryatiy sajítita vuryimura varityi sadityanu Jesucristuntiyu. ¹⁴ Jiryecha sadadyeñu siityevay, ne jiryajudera jijechipiyajada ranachojú tariy jiryeniruyada rapurya, daryatiy jiryenirunuyada tara jiryatiy jiryevyichanuyada datyisamiy variy. ¹⁵ Daryatiy savichasara sami nitii natuyada jirye, daryaday jiryechaniy samivye jivyichadedamujuyu. ¹⁶ Daryatiy nucharanuma Judenu niquejadamu darya:

“Jiryatiy ravychasara sami, jiryecha samivye daryantidye.”

¹⁷ Jiryítatyi siva “Vujye,” nitiiy sachaniy nuñi ti sitenu yivaayada murichirya, jiryantya ramityaniy jichuvuyadamu varirya jiryunda jiyomu. ¹⁸ Tapi jiryedyetyanuma nutyuramusiy sataryuyada Judenu jirye jiryevyichada rapuryajisiy jiryatiy jiryedyetyadara tarijyemyi vichasada. Tama sataryuyada criquiy rapuryata jirye, tama. ¹⁹ Sataryuyada jita Jesucristu jnutya nudata jiryedye, jiryatiy jaryinra criquimyusirya. Jaryi samirya daryajura sadiiyada day, vuryetyanusada jiyadaju. Daryatiy rityeryuyada tarijyemyirya jiyuuchueda ramityadeda samiy carniru

jnutya nudata, jiryatiy ruveda jiyuuchaveda murichiryani, daryanday sataryuyada Judenura vuryetyanusadantiy, Jesucristu batyedata sataryuyadara, jiryatimyu ne juuchaŋi daŋi. 20-21 Sabayada jita Judenu vuryeyada rañujuni, mucadi judayadajisiy sabayadani. Diye, tamitya rundamu jita, sadityadoda vuryeyadajuni, jiryatiy vutyuvachu Jesucristumusi simu, nitiy misadeda diibyimusiñi, satidye say variy jidyanuyadani. Ramunitiy vuryatuvachusara simu Judenu, vuryanutuchara variy sajiju Jesucristu.

22-23 Jiryatiy jiryepyumyara jijechiy, sitenu saniquejadamu tuvachuvay daryaju jirye, jiryatidye vatasara nutyu taryivedayu, jiryantya vata samiy jachityavay nuñi tevayu, jiryatiy jiryevyicha vadi piruvye Judenu niquejadamusi, ne diiyasavay variy jiryeñuday, jiryatiy jnutya daryajura saniquejada day, rasuruy junareju risajuntiy. 24-25 Darya nuchara niday Judenu niquejadamu darya:

“Rivyicha nijyanvay nutyu vachuy, riryetyeda jita nutyu vachubyi. Ráridyeje vachuy, rajuy variy rabi; Judenu niquejada jita suruy junareju day.”

Rani jita jiryiva tuchusada niquejada jiryatiy samirya darya.

2

1-3 Ramuni jita jiryatiy jiryejetyama daryaju yivasirya taji jachipiyajada, quivuyada, jiryituyadamu vichada, jiryennuvayadamu vichada, titaju jamirya niquejada jarye risaju,

ramunĭ jiryavātara Judenu niqejada jiveyedaĭu
jiryintumu, daryatiy savatasara vadi rupira
jityaja, jiryentyama daryaju sitenu samini
Vuyntyityu vujyu.

*Crĭstu vichasara ravichu jnuñu; vuvyicha sani-
jyanvay jaryetasavay
(Róma 9.32-33)*

⁴ Jiryiti ĭita simu, jiryatiy sajaryetada Judenu
nutyu ravichu jnuñujuni; dañuma riñi rrachu ni-
jyanvañi, sunuy Judenu jaryi samini satidye roriy
yajiju sata. ⁵ Saroriy variy jiryetya, nutyu ravichu
jnuvye jivevyicha sisa daryajuntiy, satidye roriy
yajiju jasityi jiryajvaay ĭiintyevye saĭu, jiryatiy
jiryintatya simu jvaayadajuyu, sadiry variy Je-
sucristumusiyy jiryey. ⁶ Sutañuyada daryaju jiryatiy
nuchara darya:

“Jiryajnuyy, rabe rañijyanvay vichadamuni
ravichu, jiryatiy rajeryetada roriy
surutyajuni, jaryi sami daryaju rajuni.
Nĭtiy tuvachu simu, ne sajada variy.”

⁷ Jiryeyju ĭita, jiryatiy tuvachuvañuma jiryedye,
savichasara jaryi sami, va rijyu jiryatimyu ne ri-
tyuvachuruy simu, savichasara

“Javiryutyasi ravichu, jiryatiy riñi rrachoda ror-
ijvaavyeñi, sabamya Judenu variy Jiry-
orimiyuni ravichu jaryiñu day.”

⁸ Savichasara

“ravichu casinuyata, ĭamu ravichu rip-
yarutedaju.”

Rityi vichasara tuvachusamiy rupatyeya
jijechipiyajadamu saniquejadanachoju, daryatiy
sabayada Judenu rijyura.

⁹ Jirye jita vichasara nijyanvay jaryetasavay Judenumu, nijyanvay jiintyasavay Judenuju, jiryatidye jvaay vatajuu saju. Sitenu saniijanvay jiryedye, jiryatidye tuchura sivaayada tittasara vijyomujache, nitiy natuyada juuchaveda nupocudinubesiy jirye, samirya vandajomuju. ¹⁰ Jiryatimyu ne jiryevyichanuyada nijyanvay nta, jiryeñiday vicha Judenu nijyanvay diye; jiryatimyu ne jiryedyetyanuyadara santutyada, jiryeñi jita datya diyera.

Vuryantya vichasara Judenu niruyadamuju

¹¹ Ravyatavay, rayasanta jirye, jiryatiy taji vichavay jijyomu vuy, vinu jañuvye jirya mucadimu vuy: Jiryantya jiintye vacha niruyadajisiy, tapi ruvachara vudyirya niruchara vuryintu jiyaroju. ¹² Jiryantya vichasara samivye, tuvachusamiy cabyimu, ramunitiy dañuma rityuchuta nutyu jamirya vichavay jirye, riryadiy samiy riva jiryevyichadede, riryatidye jchanatya rivani Judenu tamitya rundamu, jasityi samurichenutanirya vuryivaayada murichirya.

¹³⁻¹⁴ Jiryantya vichasara sabuvye, nijyanvay nusuyadamuju, Vuyntyityu jtedamu, varimyata jamu nutyityumuju, varimyata japumuju, jiryatiy sabay jamu nutyityuni japu satidye tanuvunu riy jamirya vichavay; ramujuntiy, satidye jchanatya variryi samirya vichavantyidye. ¹⁵ Tapi savata Judenu darya vujyu, vuryatidye dasaniy samirya vuvyichadedata riy datyisamiy, jiryatiy riñiquesarara nicyaray. ¹⁶ Vuryantya jiriryira ratyadoda, ne vuryajarupanu jadchiñundyerya. Vuryantya vichasara ratyanusavay, Judenu

muchechiy ratyadodamuju. ¹⁷ Vuryantya vicha samirya rusa títaju. Vuryantya vatasara riy vutyeryiveda Jesucristumu. Vuryantya diy vuchuvuyadamu variy samirya siva Judenu. Vuryantya tuvachu ramu jamu nutyityu niquejada.

Vuryajantyara Crístu vichada parutyadanubesi

¹⁸ Jiryatuvachu cumudemiy, jiryantya vicha siityevay saju jipyatru jiryechuvuyadanube, ne vinu saju jiryatiy samirya jachityini, jachipiyajadati risajuni; sajuntiy jiryatiy niqerya dañi. ¹⁹ Tapi sucanyu Judenura vuryityi jachinityara parutyada vichada, jiryatiy jamirya jachipiyajadamu riryarupanta vuy, jasityi vujechiniy Judenunijyu jachipiyajadamu vuy. ²⁰ ¿Chi rajchanatya varivyuy, chi? jiryatiy vujechinitya tapimusirya suveda, jiryatiy ti jvay taji jvaayadiva vuy. Jasityi suveda samirya jvaayadiva vuy, vujechinitya tapimusiy varirya, rani jita Judenu jacharaju. ²¹ Ne jiryinuy sanatyada Judenu ranachoju vuy, vuryatidye datyara jarupanusada sayadaju, daryani sadatyada Crístura jarupanusada vuryeyadaju. Nini vichada jantyasi vuju, vuryatidye jantya varirya savichadantidye. ²² Tama sani juuchurveda, tama, dantyamuy ne saquivyada jñiquejadata. ²³ Varityi riryavityiyeyadani, ne sumutyajada javityiyeyadamu variryi; varityi riryarupantadani, ne satuchutada jamirya niquejadata riy, mitya suntatyada Judenumujura, jiryatiy sachaniy vase rivaachadiva riy.

24 Sadirya yimutyajada jivyuvara vujyuuchueda, jasityi sabatyeda crusityasa, vuryatidye vicha variy samivye Judenu jtedamuju. Sajiintyama daryaju vujyuuchuedajisivyuy, samisadede Crístu vatajomusiy varivyuy, jiryatiy vuvyichanuyada jdivajnuvay juuchuedamu. 25 Vuvyichanuyada daryaju nutyu sasi caravyentyi, vuryanumityeñuma diye simuju vubeyanu jnutyintiy.

3

Nutyura riryivyichasara jamuvye

1 Daryamusintiyi riryasiitye vatuy jivyanuju; tanuy vanu vichasiy tuvachusa Judenu niquejadamu, satuvachuruy variy jivyaturuy vichadamusiy, dañumamuy ne nanatuchu tara siva Judenu niquejadanchiy. 2 Darya racha jiryatiy sadiy nanuvanu riva nanuvichadede suvuyadamu, jiryatiy nanicha vaturuy samirya jvadiryuy jivyanuju. 3-4 Nanundaniveda rachasara jijechemistry, jiryatiy samirya jachityanuy daryaju nada, ne jarupantadaju racha nanundaniveda, jiryatiy nanuvichasara siitiejada jachityanuy, sabonu nanintu, jaryi ramurichevay Judenu diya daryaju day. Rindanivay, ne ravatara jnojasiy pisiyada, dantyamuy ne saratyanuta vandantiy, dantyamuy ne sujatyera jaryi murichevarya. 5-6 Darya jiryinuy rivyichanuyada tarijyemyi vatuy, samirya vichavay, Judenumu tuvachuvay; riryetyadoda jijechemistryu, jiryatiy rivyichanuyada sabuvye jivyanuju,

daryatíy nanusiitenuyada Sárájube jivyanu Avurábajyu, naniteda nutyityu variñi. Jiryeniicha nanudadyeñu jasityi jiryavichaniy samiryamu, ne jiryasuvuy suvucharamomusiy.

⁷ Vaduy jita, daryantya riryechasara datyada jachityavay jivyaturusa, jiryatíy sundejada Judenu ni vatura vadiiryonu vanumusiy. Riryajnyu vaduy samiy riñecho jivyatuy, jiryatíy rumutyá jidchavu rusara Judenu jantyutyada, junare jnyadaju, rañuma sura varirya rityuchoda sisa Judenu.

Riryarupanta samirya vuvyichadiva vuy

⁸ Rañique tamitya jiryiva titaju, vuryantya jachipiyasara vatajuu, vuryantya vichasara vutyeryivedaniyyu jachipiyavay, jiryatíy jaryi vuvyata vuy; vuryantya jantyutya nuñivajyuu vuy, samirya jachityavay vichadamuju.

⁹ Ne vuryamurichenu taji vichadedatani nitíy vichaniy taji nta vuy, dantyamuy ne vuryajavityiyeni nitíy javityiyevyuy. Vuryantya nique samirya sanijyu jiniyaresiy, vudyetya daryaju sanatuyada Judenu ranachojú vuy, vuryatidye jmutyara samirya vichada sutedamu. ¹⁰⁻¹² Nucharanuma daryaju Judenu niquejadamu darya;

“Nitíy jnuryuy, saramityaniryuy samiryamura jiryundantíy, sama suutara vacha niquejada yitosiy, saparuy riva quivuyadantíy. Sama juintye vacha vichadajisíy, satidye vicha samirya; sama vata ranachó samirya vichasada, satidye sarye varirya. Tapi sunuy Judenu samiy

riñecho rityi vicha samivye sutedamuju, satuvachusara jita varirya rijechiñuyada. Sanumitye jita riryajisiy jiryatiy vacha vichavadyeryi.”

¹³ Ne chi rachaniy tara jirye riva nuday, jiryetyi jiryiryi vichadeda samirya. ¹⁴ Variñumatiy riryarupanta samirya vichadivasiy jirye, jiryecha jchanatyasavay variy. Ne jiryasuvuñi ti, dantyamuy jiryajnutay riñuma jatachu rata jiryetyuvachodajisiyu. ¹⁵ Jiryantya bañi Crístu jiryejechiy nutyityuju, jiryama jachipiya samiy, jiryatidye datya jmutyajada vijyomujachení nítíy jtajanu yintuyadanchiy jirye, jiryatiy jiryentuy sajiju. Jiryajmutya tapimusiñi, jiryechuvuyadamusiy. ¹⁶ Jiryantya vichasara samivye Judenu diya, riryatidye jada variy rityi tuchuta quivuyadamu jiryevyichadedivayu, jiryatiy Crístu siityarivay daryaju jiryedye. ¹⁷ Satiy vata Judenu darya jiryeyju, dañuma riryajarupanta samirya vichadedivasiy jirye; ne samirya jiryavichaniy nicyararyi jiryatiy riryarupanta jirye. ¹⁸ Tapi daryantiy, dañuma sanichanuyada Crístu samí, sarupantatadeda Judenu nicyaray vichavay vichadeda murichiryani, sabatyedama variy rijyuuchurveda jiyadaju, satidye tuudityaniy Judenu variryi. Dañuma ruvedara savu, samisada variy yintumusiy. ¹⁹ Suntumusiy jita jiyada variy tuchú ribeyanuju, jiryatiy tanuvunujovimu riy. ²⁰ Rivyichanuyada tuvachusamiy daryaju, jamu cartye jvaayadasaraju, jiryatiy sivaayada Novébay tarirya; sajachinityada Judenu

tapimusirya nicyaray rivyichadeda nijyanvay variy, rarundasaraju jasityi saporutada jata riy, vinu munvañijyate machojada riryiinra, jiryatij rijeyada cartyevimu, rantyuyada ja variy ruuva, jiryatij rappayajada cartye variy jamova. ²¹ Daryamusintyi rantyuy ja jiryiva jiryityuyadamusiy; ne jiryatij rapurya mi jiryevyuvasiy, ramusiy jita, jiryatij jiryimutya samirya jachityavay: “¡Jo, ratyuvachu!” Daryamunij rantyuy nta ja variy jiryiva Jesucristu misadamusiy. ²² Ninij jita vichasara diye Judenu nutyityudamyu, jiryatij sitojadama jarichumu, variñuma sasabodeda Judenu saju riy yipavay, bayantu nutyityumiy jarye.

4

Vuryantya jvaay jasicharajutiy sasay Judenu vuy

¹⁻² Ramutij, nutyu savichada Cristu parucharij jivyumu, jiryantya vanutya darya jachipiyajadatayu, tapi nitij vicha parucharij vichadata jivyumu, ninij paruy riva juuchueda, satidye ramitya varirya jiryunda jiyomu Judenu niruyadamu, ne savichasara jidyirya niruyadamu nuday. ³ Rasaranuma jita jiryatij tarij vuvyichanuyada vacha niruyada jvaayadacanimiy, daryanij rivyichasara tuvachusamij. Vuvyichanuyada variy jarupadodacanimiy, vacha niruvye, niyuyadacanimiy jarye, rayajomu jiyadacanimiy risaju vuy. Vuvyichanuyada variy taji nta vichavay, jiiputeranachoju jachipiyajadamuntij, jiryatij Judenu jubachara vuryajisirya. ⁴ Rityitta jita

tavay varivvyuy jiryatimyu ne vuryupiryuy datyisamiy rusa nūday, riryavityiye variy riva vuy. ⁵ Riryantyate tūchu siva Jūdenu darya rivatīy sachaniy tara rivyichādiva tītaju jnūvyeyu, diibyimiy jarye. ⁶ Ramunītiy satuchoda Jesúsra samituchoda ruuva, diibyimivya jarye, riryatīdye jnūjeyasara tarījyu yintumu, Jūdenu jtedamujū, dañuma ridyīiyada nūtyu tavay diijeyasara jīyuuchavedacosiy.

⁷ Ratuudiñumara tītaju vūpyaruteda, ramunī jiryēcha datyanuvay, vanīravay jarye, jiryatīdye jachipiya Jūdenujsa tuchodaju variy. ⁸ Jiryantya vata jaryi nuñi jiryeyu, tapi vūvyatadamu vuryamityara rajuura vūtyevay juuchūveda. ⁹ Jiryantya jmutya jañūvye nuñi jiryeyu, samirya jachipiyaadamujū. ¹⁰ Jiryatīy sasayada Jūdenu nuñi tiquira tara ratatīy riryajmutya riy jityevay, vuryantya jmutya nuñivajyuu vuy, daryatīy vuryimutyara jaryedo simusiy. ¹¹ Nītiy jmutya jīñiquejadata, santya nique Jūdenuju; nītiy jmutya jvaayadata, santya jvaay daryasarajutīy sasay Jūdenu savanuyadayu, riryatīdye jchanatya nijyanvay rivani Jūdenu, Jesucristu jtyamu. Simunī jīta rachasara tītaju vanda, nusuyada nutyityu tītaju junareju. Daryani ramachosara tītaju.

Paruchariy vichadata riryajiyasanta vuy

¹² Ravyatavay, ne jiryatītta rajīju jantýasarayu, ratatīy sajantya Jūdenu nūtyu jīdatya nta jirye. Tamā tara tītāsara ranīcha, tamā. ¹³ Jiryantya jchanachara ramu daryasarajutīy ritī jarupantasa Crīstusa, jiryatīy jiryeyaruryara, jiryatīdye

jchanay jiyarovayajadamuju, sanumatiy dityanura jidyanyada.

14 Rityi javityiye Crístu jtya jiyadasiy jirye, jiryecha varyi jchanatyasavay riva, tapi racha Judenu Jnutu danuyada jiryiva varyi. 15 Jatyi savicha jita ti jiryetyenu juvi, dantyamuy ne paranuni, dantyamuy ne vacha jvaarya, dantyamuy ne tisa jityenurya, ramutimyu ne riryavichaniy tarani. 16 Nitiy vicha jarupantasi jiryatiy sasiityari daryajuni Crístu, ne sajada varyi jichiityarijadiva, santya jchanatyaní Judenu varyi ramusiy. 17 Ritima jita rarunda satidye jota vichadedá Judenu tara nta riy jñijyanvay, rijyuuchueda jiyadaju. Jiryatiy rajota munatya vuñijyu, nutyuranintiy racha tamitya riñijyu rityimyu ne tuvachuruy samituchodamu jiryatiy Judenumusirya. 18 Parucharimiyusityi vuñi ramitya, jiryatiy sutedamu samivyevyuy, ¿te riryajto varyi rityimyu ne datyaruñi Judenu, te? jiryatiy juuchatavay jarye risaju riy. 19 Ramunítíy jiryatiy parucharíñube vuchiityarini Judenu yitedamu, vuryantya jnutatyaní vuryintu simu Vuryindenu, samiy vuvyichadedamu vuryantya jnutatyaní vuryintu simu, nitimyu ne quivuyada sadatya bayada junare jnyadajuni.

5

Riryajnutya rimyityumiryi Judenu siityarivay

1-2 Jiryatiy ravyicha Judenu siityarivay jnutyi, ratyuchu vijyomujachentirya jiryatiy radyi riva saparutyada Crístu, radatya sisantirya vandantiy, jiryatiy sadityanu Judenu varyi simura. Ramuni

rayasanta jirye ratyevay jnutyavay: Jiryantya potyaniy Judenu niquejadata riy sasiityarivay jiquebyimu. Jiryantya jnutyasara vanira jachityavaryi, Judenu jtedamuju, ramunitimyu ne sunutyataniy ti jirye, dantyamuy ne jiryatidye canarya criquiy rapurya ramusiy. ³ Dantyamuy ne jiryasaboniy nutyu nutyityumiryi Judenu siityarivay; jiryecha jita jantyasavay samiy vichadaju rijyu variy. ⁴ Sanumatiy jutí jnutyavay nutyityu Jesús, jichiityarivay jnutyi, jiryajmutya variy simusirya jiyarurya vanda parenu day, jiryatimyu ne vanay jarapuryara.

⁵ Daryamusintyi rayasanta jirye vaderovay, jiryantya tuvachu ruumu rimyityumiy. Jiryantya tuvachu titaju nuñi jirye yimu. Siityejada jachityavay jiryecha, nucharanuma daryaju Judenu niquejadamu darya:

“Sayaronu Judenuni yinnuvañu, sasay jita yimutyadani jiryatimyu ne yinnuvañu dañi.”

⁶ Ramuni jiryechasara sabonusavay Judenu datyadamusiy, satidye nubesityaniy samiryundamu variy jirye. ⁷ Jiryantya jatyara jijechipiyajada sanijyu, jiryatiy sunutyasara daryaju jirye.

⁸ Jaryi ynutyavay jiryecha, jiryatidye jnutyanyumaya sajisiy bayantu nutyityu Satanásiyu, tapi savutayasara nijyanvañecho, ripyarutedaju, nutyu nibyi jachijadacanu. ⁹ Jiryantya vanutya jityuvachodamu sajisintiyiyu, jiryedyetya daryaju: ridyetyanaya jiryetyevan-tyirya darya parutyadantiy, titaju vichadivantiy.

¹⁰ Jiryeñumatiy datya taraquidejura parutyada

sayadaju, saratyanu Judenu samivyejyu variy jiryey, sasurutyaniy variy risaju jiryey, savanutyaniy variy jiryentyi. Niní say títaju vurya vuryentyutyadaju, jiryatíy sanatuy jivyichajo vandajomujú vuy, sadenu Crístumusiý jiñatuyada junare jnyadaju vuy. ¹¹ ¡Saju jíta rachasara vanda nusuyada junareju! ¡Daryanuma rachajayasara!

¹² Rañúmyara jirya caterade jiryeyju. Rañúy Sinubánutara, nítíy jiryítay jityeryí tuvachura. Rayasantasiy catera núcharata jiryey, ratyuchumá jítara sítenu Judenu sayada vuryeyadaju. Jiryántya rupade jijehtiyara.

¹³ Rímyuchuvay jiryetyevay siityarívajyuuyu, jiryatíy Babinóniyamu vichavaryí, Judenu jaryetasavay jidchavú jiryey. Daryantíy samuchuvay Márcu jiryey, radyenu rítay daryajuní. ¹⁴ Jiryántya muchuvay Judenu vatadamu nuñi jiryeyu. Samirya jiryecha títaju jiryatíy Jesucrístumu jiryey.

Sayanuma Pyítru

Judenu jto nijyanvamyu
New Testament in Yagua (PE:yad:Yagua)

copyright © 2008 Wycliffe Bible Translators, Inc.

Language: Yagua

Translation by: Wycliffe Bible Translators, Inc.

Yagua [yad], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yagua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2023 from source files
dated 29 Jan 2022

741209ce-3bea-5617-a721-dc112d0873cd